

嘉慶松江府志

松江府志卷五十三

古今人傳五

明

徐階字子升華亭人嘉靖二年對策第三人授翰林院編修帝用張孚敬議欲去孔子王號易像爲木主籩豆禮樂皆有所抑損下儒臣議階獨條不可改者五不必改者三辭甚辯斥爲延平推官攝郡事出繫囚毀淫祠捕劇盜百二十人遷黃州同知擢浙江按察僉事進江西按察副使俱理學政皇太子出閣召拜司經局洗馬擢國子監祭酒遷禮部右侍郎改吏部進禮部尙書加太

子太保進少保兼文淵閣大學士參與機務密白咸寧侯仇鸞輸情誤國狀奪其大將軍印鸞自恨死進兼太子太傅武英殿大學士加少傅改兼吏部尚書楊繼盛論嚴嵩罪狀中有二王皆知其奸語帝下繼盛錦衣獄嵩屬陸炳根究主使者階以危語動嵩事乃寢倭關東南階力主發兵又念邊卒苦飢請收畿內麥數十萬石自居庸輸宣府紫荆輸大同帝卽傳諭行之加兼太子太師進少師階有權略初事嵩甚謹知帝聞嵩貪及世蕃奸恣狀乃令御史鄒應龍劾之帝勒嵩致仕謫戍世蕃階代嵩爲首輔帝卽以嵩直廬賜階階勝三語其中

曰以威福還主上以政務還諸司以用舍刑賞還公論
於是朝士侃侃得行其意袁煒數出直階請召與共擬
旨以張孚敬及嵩等導帝猜刻力反之務以寬大開帝
意帝惡給事御史抨擊過當欲有所行遣階委曲調劑
得輕論廣東大寇張璉平帝以運籌功賞階階念閣臣
與邊功賞自夏言始至嚴嵩時益濫及乃擬旨軍功論
賞非親戰守者不得與閣臣始不與邊功賞進建極殿
大學士袁煒以疾歸階獨當國屢請增閣臣乃命嚴訥
李春芳入閣自嘉靖中葉南北用兵邊鎮大臣小不當
帝指輒逮下獄閣臣復竊顏色爲威福人惴惴不自保

階當國後緹騎省減詔獄漸虛任事者亦得以功名終
嚴訥請告歸命郭朴高拱入閣與春芳同輔政事仍決
於階階數請立太子帝寢不報已而景王之藩病薨裕
王雖未正東宮位由此定階遂不復請奏奪景府所占
陂田數萬頃還之民楚人大悅方士胡大順等勸帝餌
金丹帝病躁戶部主事海瑞極陳帝失帝悲甚欲殺之
階力救得繫未幾帝崩階草遺詔凡齋醮土木珠寶織
作悉罷大禮大獄言事得罪諸臣悉宥復之夜召門人
學士張居正與謀質明裕王入臨畢階遂以詔草上令
旨報可詔下朝野號慟感激比之楊廷和所擬登極詔

書爲世宗始終盛事云同列言拱郭朴以階不與共謀
不樂令御史齊康劾階言其二千多于請及家人橫里
中狀階疏辨乞休九卿以下交章劾拱嘗階拱遂引疾
歸康竟斥朴亦以言者攻之乞身去南京振武營兵屢
譴階欲汰之慮其據孝陵不可攻也先命操江都御史
唐繼祿督江防兵駐陵旁而徐下兵部分散之事遂定
羣小璫毆御史於午門都御史王廷將糾之階曰不得
主名劾何益且慮彼先誣我乃使人以好語誘大璫先
錄其主名廷疏上分別逮治有差階之持正應變多此
類給事中張齊以私怨劾階因請歸帝許之賜馳驛給

夫廩璽書褒美行人導行如故事階旣行春芳爲首輔
未幾亦歸拱復出厄階不遺餘力詆階所草遺詔爲悖
逆會拱復爲居正所傾而罷事乃解萬歷元年階年八
十詔遣行人存問賜璽書金幣明年卒贈太師諡文貞
階少好學素愛禮士大夫立朝有相度保全善類嘉隆
之政多所匡救閒有委蛇亦不失大節子璠以廕官太
常卿璉璵尙寶卿孫元春萬歷二年進士官太常卿明史
潘恩字子仁上海人嘉靖二年進士知祁州調鈞州州人
相語曰毋相仇避潘侯毋甚口愧太守歲積儲爲列城
最祿則振廩貸之擢南京刑部員外郎遷廣西僉事督

學政時靖江王驕恣其衛卒子弟毋得充諸生卽充諸生必以賄不則銀鎗其父兄恩移長史謂王復勒諸生試者吾立糾汝諸生乃得就試嘗署按察篆鉤捕王所匿大猾王恨次骨上疏誣恩上遣法曹置獄會勘事得直進四川左參議歷遷浙江參政按部海鹽島寇猝至圍之數十重時城無見兵率吏人晝夜登陴不少懈城卒以全進雲南按察使擢江西布政使出撫河南徽恭王子載堦常微行多掠良家子充後宮占民田殺無辜恩與御史悉發罪狀論廢徙徽王失國伊庶人怙惡尤甚恩益厲收其佞幸考治之遷刑部侍郎再擢南京工

部尙書時督餉都御史章渙上疏以經略中原名觸上諱當得誹謗罪雲南巡撫游居敬與黔國相軋黔國以事中之將坐以激變恩上疏救皆得比寬典改左都御史請飭臺綱剔利弊皆嘉納之已請致仕卒年八十七賜祭葬贈太子少保諡恭定子允哲允端竝有傳

陳志賢達

趙綸字廷言上海人嘉靖二年進士知內江縣民有利姪財產手刃七人詐爲盜殺綸片言決服人以爲神蜀久無雪綸至三白兆豐蝗不入境粟一莖五穗士民刻石

稱三異擢南京刑部主事卒

湯幢小品參
西林雜記

李日章字尙綱華亭人嘉靖二年進士授刑部主事有巨

璫欲有所逮捕求見請託日章曰越百里而逮人非法也不聽遷員外郎中知襄陽徙長沙先是大鴻寇數千人屢招輒叛日章督兵進剿縛其酋長斬獲甚衆餘寇悉降事聞賜金綺晉副使尋有忌者遂歸所著有狎鳴亭稿孫紹文著雲間人物志

陳志賢達

楊子亨字履卿華亭人居漕涇嘉靖四年舉於鄉選順天司理小大之獄必察以情密雲田氏陷大辟誣服拘繫十八年訊出之河間民陳橋已論死子亨知其冤虛心推鞠脫之獄轉太僕丞移疾歸

陳志賢達

石英中字子珍上海人邑侯鄭洛書負人倫鑒一見稱奇

才嘉靖二年成進士官刑部主事以事獲罪去官益窮
愁著述爲古樂府紀夢七宣等作含譏隱刺類鄒陽枚
乘而綺麗過之所著有石比部集

上海志

劉兆元字德資上海人父鈍傳見前兆元嘉靖四年領鄉
薦授懷慶司理嘗慮囚一女子呼冤繫獄已二十年察
其誣出之武陟富人以女許巨室壻家後貧欲離婚責
令歸其女而心疑富家多婢恐非真知有老嫗識其女
令饌之果非真兆元怒欲按其罪乃復以真女成婚尋

病歸卒

陳志
賢達

胡芳字汝載上海人事後母至孝母疾芳不解帶者逾月

中裨廟牖皆親爲洗滌家無儋石而好給宗人之不能
舉火者一日肅衣冠行市中其族弟恥衣敝縕亟走避
芳呼而語之曰人患行不完豈恥衣破邪解衣衣之以
貢爲武昌丞監司重其清操擢昌化令過金牛驛題曰
金牛豈是無金地只有夷齊不動心尋自引歸與樵人
牧豎放浪隴畝閒長於詩歌聲調偈古議論多依名節
著有昌化集藏於家

上海志

徐獻忠字伯臣華亭人學博才高日讀書盈寸嘉靖四年
舉於鄉再試公車被黜選奉化令約己惠民邑大治致
仕歸葬父吳興愛弁何諸山之勝乃徙居焉其詩朔源

漢魏汎濫三唐自從吳興後詩格益進時顧應祥劉麟
蔣瑤諸人於峴山爲耆英會爭致獻忠以爲重卒年七
十七王世貞通行部至爲經紀其喪而葬於九霞山之
陽門人私謚貞憲先生

婁志

馮恩字子仁華亭人祖海號存朴性純孝里中稱爲苦孝
先生恩幼孤家貧母吳氏親督教之比長力學除夜無
米且雨屋穿漏恩讀書牀上自若舉嘉靖五年進士除
行人出勞兩廣總督王守仁遂執摯爲弟子擢南京御
史巡視上江指揮張紳殺人立置之辟大計朝覲吏南
臺例先糾都御史汪鉉擅權請如北臺旣畢事始許論

列恩疏爭之得如故帝用閣臣議分建南北郊且欲令
皇后竢北郊下詔令廷臣各陳所見而詔中屢斥異議
者爲邪徒恩上言明詔令直諫又詆之爲邪徒安所適
從哉況天地合祀已百餘年豈宜輕改禮男不言內女
不言外皇后深居九重豈宜遠出郊野願速罷二議毋
爲好事希寵者所誤恩草疏時自意得重譴及疏奏帝
不之罪於是益感奮十一年冬彗星見詔求直言恩以
天道遠人道邇乃備指大臣邪正而極論大學士張孚
敬方獻夫右都御史汪鋐三人之奸帝得疏大怒逮下
錦衣獄究主使名恩日受榜掠瀕死者數語卒不變明

年春移刑部獄論死長子行可伏闕訟冤終無敢言時
鉉已遷吏部尚書而王廷相代爲都御史以恩所坐未
當疏請寬之不聽比朝審鉉當主筆東向坐恩獨向闕
跪鉉令卒拽之西面恩起立不屈叱卒皆靡鉉曰汝屢
上疏欲殺我我今先殺汝恩叱曰聖天子在上汝爲大
臣欲以私怨殺言官邪且此何地而對百僚公言之何
無忌憚也因歷數其事詆鉉不已鉉推案起欲毆之恩
聲色愈厲廷相曰馮御史無多言我朝不殺諫官百五
十年矣豈今日破祖宗法又好謂鉉曰公當惜大體不
可以私怨廢公義夏言亦曰此豈冢宰私家邪鉉稍止

然猶署情真恩出長安門士民觀者如堵皆歎曰是御史非但口如鐵其膝其膽其骨皆鐵也因稱四鐵御史恩母吳氏擊登聞鼓訟冤不省又明年長子行可上書請代父死不許其冬事益迫行可乃刺臂血書疏自縛闕下帝覽之惻然令法司議遂遣戍雷州越六年遇赦還穆宗卽位錄先朝直臣恩年已七十卽家拜大理丞致仕八十一卒行可字道卿上書訟冤時年十三後領嘉靖十九年鄉薦謁選授光祿署正遷應天通判所至清惠有聲時可自有傳

婁志

顧中立字伯挺華亭人嘉靖五年與弟中孚同登進士授

刑部主事改儀制司郎中出爲山東僉事嘗行縣發粟賑飢吏請白撫按中立叱曰民且死何可俟也遷廣西參議致政歸闕地爲園池名其堂曰洪厓杜門栖靜獨處一室更扁曰鐵漢窩有道人薛頭陀者謂可入道徑謁授長生訣中立雖敬禮之謂人之正氣自可長留天地間何待解脫始稱仙人邪中孚字伯誠由進士授崇仁令治尙嚴明俗好鬪至募拳勇爲師中孚盡逐之按籍索田而詭寄者息遷吏部主事擢雲南參議贊總督犁徭人巢穴歸良家子女被虜者千三百人有金綺之賜歷江西按察副使逮分宜蒼頭數人置之法擢浙江

參政尋乞歸

雲間志略參
江西通志

諸傑字子興上海人嘉靖五年進士授刑部主事以建言
謫典史起國子監學錄累官尚寶寺少卿傑有氣節能
文章時閉戶漁獵墳典尤嗜左國撰述必求其肖一時
鉅公志銘得出其手爲重工詩遇名勝題詠殆徧

南匯志

張永旦華亭人與馮侍御恩友善博學善楷書年七十母
年九十餘馮嘗招飲不赴至則僅嘗一味問之答曰母
所未啖某何忍食馮憐其誠後有設必先貽其母永旦
受以供母始赴飲極歡孫汝霖亦以孝謹聞

華亭志稿

姚鵬字程夫華亭人忠信誠確顧文僖重之後以貢爲南

安學訓師範嚴肅南安鄉會試中者絕少鵬至始奮於
學每科獲雋有兄弟同登者致仕歸操履彌篤年七十

七卒

郭志
獨行

馮遷字子喬上海人父淮見流寓遷工於詩潘恭定稱其
采掇精英鋪張平實朱邦憲云子喬緣情定體鑄詞雄
麗雅淡之言皆備著有長鈇齋稿

上海志

陸應寅字虎臣華亭人居望仙橋年十七執父喪哀毀奉
母至孝嘉靖七年舉鄉薦二十年長子從大成進士應
寅選應天司理有良民陷大辟歲不決應寅立白其冤
後解官其人橐百金爲報正色拒之遷廣東鹽課提舉

中途乞歸杜門卻掃以詩文自娛

郭志獨行

王鑄字宗顏華亭人學問淹博嘉靖七年舉人選龍溪縣有政聲秩滿當卓薦以與考功郎有卻格不行遂拂衣歸杜門教子所著有綱目易覽綱目節評考見錄詠史詩荆楚稿

郭志文苑

楊樞字運之華亭人居祥澤嘉靖七年舉於鄉授延平推官時河南飢民八十餘人流入閩監司將繫之盡坐以盜樞力爭得釋漳倖被誣樞白之倖德樞飲酒閒以美帶潛易其帶立追還之擢辰州同知會有齟齬者調漢陽尋改臨江嘗除夕草文檄比成漏下四十刻矣卽出

具公服望闕稱賀他勤職類此以過勞得疾卒於官著有連山數學言史愼餘松故述火餘雜著等書子豫孫字幼殷嘉靖二十六年第進士由南京吏部主事歷官禮部郎中擢湖廣副使轉河南參政入爲太僕少卿改太常豫孫以才敏著嚴世蕃稱之曰天下人才惟吾與楊博楊豫孫耳徐階當國引以自輔嘗奉世宗手敕不可句讀豫孫一見卽解官至湖廣巡撫著有經史通譜

宸史琬爰錄

妻志

沈愷字舜臣華亭人嘉靖八年進士授刑部主事編修徐階疏辨張璁黜孔子王號之非上怒欲逮置重典當時

親故無敢過門者愷問訊無異平日階拜首接愷不加
一秩世愈高其品擢守寧波遷參政念母老乞歸穆宗
卽位卽家起太僕寺卿不赴放情山水作環溪亭又招
致賓客以賦詩述作自娛善懷素草書所著有環溪集
守株子論從子紹文字孺休善屬文其詩蒼深渾雅晚
詣自然王世貞詩評中所云孺休如蜃樓虹御不在人
間者也書法道整兼歐虞之長所著有寶言堂集

郭志文苑

徐宗魯字希曾華亭人嘉靖八年進士知峽江縣舊有虛
糧累民戶納多逃亡宗魯躬自履畝丈量置魚鱗冊以
便疆理歸戶冊以便徵輸豪右不便出流言阻撓宗魯

持必行比入覲夏言柄政欲移令貴溪宗魯以清賦未
畢辭隨伏闕具疏得報聞獲減原額二百十八里爲百
八十里賦額始正迤民漸還召爲御史巡按八閩時延
平永平多盜賊道路梗塞設方略次第就擒又疏論柄
臣嚴懼二相不法事竟以是歸著有松寇紀略均糧拙

議南湖類稿

婁志

鞠惠字秀芝華亭人嘉靖八年選貢授平涼府通判調廣
西平樂府撫治有功加僉事服俸晉奉議大夫提督富
賀軍務總理平樂兵餉剿戮八源安撫三峒蠻夷感化
八源三峒諸處每三里建一石碑三十二年倭亂時巡

撫周某調苗兵五千乃其舊部卽收服八源三峒之雄兵也巡撫請惠提督以年老告歸卒年九十著有叢談

娛老集智息齋焚餘稿

陳志賢達

姚篚字登之華亭人父參前有傳嘉靖十年舉人授廣信府推官築玉山城置關隘山賊不敢嘯聚遷宿州知州招撫流亡給牛墾田四千餘頃立社倉教機杼民咸賴之官至貴州僉事

金山志

錢師周字君輔華亭人少負才氣工舉子業陸文定樹聲出其門嘉靖十年舉鄉薦知南樂縣陞思南府知府不樂遠宦因致仕歸卜居橫雲之麓日權扁舟逍遙峯柳

閒賦詩以自遣年九十四卒有午江詩稿

襄志

包節字元達華亭人居漕徑生五歲而孤母楊躬教育之
舉嘉靖十一年進士授東昌推官入爲御史劾兵部尙
書張瓚貪穢出按雲南時欲仕者知荒徼多憚往因設
告就遠方之法節言此曹志甘殺荒非年迫衰遲則家
貧急祿志在爲己豈在卹民滇中長吏所以多不得人
請自今以附近選人充之而州縣佐貳姑用此曹庶吏
治可舉吏部請以節言槩行於雲貴兩廣制可以疾歸
起故官再按湖廣顯陵守備中官廖斌擅威福節欲繩
之語少洩斌俟節謁陵時故獻膳羞遠使撤去詭謂節

麾出之鍾祥民王憲告斌黨庇奸豪周章等節捕殺章
斌益怒遂奏節不以正旦謁陵次日始謁時當進膳不
旁立褻慢大不敬奏已入節始奏斌前事帝大怒遽赴
詔獄永成莊浪衛莊浪地荒徼土牆敗屋節處之甚安
獨念其母不克終養日飲泣母訃至晝夜哭已又聞弟
孝卒撫膺曰誰代吾奉祀者哭益悲病死遺言以衰經
斂孝字元愛後節三年進士由中書舍人爲南京御史
疏論禮部尙書溫仁和主辛丑會試有奸弊且劾庶子
童承敘贊善郭希顏編修袁煒帝皆不問未幾又劾巡
撫孫禮吳瀚瀚罷去孝兄弟分居南北臺並著風采又

皆有至性節戍邊不得養母孝遂以待養歸母亡哀毀
骨立未終喪卒節亦繼殞贈光祿少卿

妻志

莊天恩字元育華亭人嘉靖十三年鄉薦工古文詞西蜀
張景賢巡撫至松慕其名乞文爲親壽文成無一詞譽
及之或謂盍少揄揚以從時好恩曰張尊官也安俟吾
譽卽譽之何足重公但質實書斯爲直筆耳人服其言
久因公車就學博陞刑部司務

郭志文苑

曹嗣榮字繩之華亭人少爲諸生時上知府喻時鈴閣春
深賦又爲曹憲副時中作宜晚堂賦雅贍甚見稱賞嘉
靖十四年第進士授南京工部主事改武選調澧州同

知會病不起歸所著有萃玉等稿性穎慧好音律凡星

與琴奕之街靡不通曉閒作竹石戲墨清逸可玩

郭志文苑

吳梁字伯材華亭人居北俞塘嘉靖十六年舉順天鄉薦

選邵武司理值島寇據建陽光澤閒梁受檄提兵入叢

箐扼其衝破走之論功賜金綺延平賊李元春乘海警

剽掠設方略繫其酋餘黨潰散擢刑部主事有巨猾以

私敕建寺事連金吾屬梁捕治金吾挾要璫居閒不聽

伺梁入朝集羣小誦之梁手捽兩人奏其事舉朝折服

出守廣西中道乞休銓部持其疏曰是強項折中貴者

可去邪梁竟拂衣歸卒年八十七

雙志

康學詩字伯玉華亭人嘉靖十六年舉於鄉授饒州司理
郡豪吳陽與弋陽豪仇殺死者各數千人案稽十餘年
臺檄學詩往讞立決無冤者調重慶案逆賊吳思義黨
閒行得渠首置之理時西寇散毛侵土司臺議發兵以
助或謂夷人自相攻耳勿助便學詩曰土司固夷然我
藩也而棄之異時何以令他土司因上便宜數事皆報
可旋罷歸卒年七十四子時萬字元修早謝舉業棲元
味道更精禪理詩翰尺牘有晉人風

陳志
賢達

曹鉉號芹泉華亭人銑兄性倜儻有幹略由郡掾選溫縣
丞歷贛州通判督橋稅羨餘悉助軍需遷兩淮運副委

濬高家堰縣互八十餘里鋌晝夜巡植隄岸鞏固水勢
深通刷沙甫一月河淮竝安賜白金以旌其功年老乞
歸與其弟禮部儒士鏞字後松敦友愛關南園藝花蒔
竹觴詠水石閒有南園倡和集

金山志

董子儀字羽吉上海人嘉靖十七年進士授刑曹改禮部
儀制司選入內閣與史館校錄凡進御雨雪祈報之文
出其手皆稱旨子儀崇論諤諤諸供奉者多白衣參雜
不能安遂擠之出判河東鹽運司益砥礪名節悉覈乾
沒諸弊未幾卒於官囊中惟圖書數卷而已

陳志
賢達

莫如忠字子良華亭人父昊成化十九年舉人官東昌府

通判有惠政如忠嘉靖十七年進士授南虞衡主事改儀制會部議孝烈皇后祔廟祧仁宗力持不可坐奪俸故相楊一清易名未定疏請得諡文襄士論以爲當擢貴州提學僉事道遠不能將母投檄歸前後家食者十五年終母喪補湖廣副使陞河南參政領京糧道進陝西按察使持法詳慎陞浙江布政使乞歸初夏言死西市門生義故首鼠避恐不及如忠獨經紀其喪包節逮繫詔獄瀕死治棗餽保護之工古文詞書法二王一時詞翰遠近購之子是龍選貢是元萬歷二十五年舉人竝以文名而是龍尤爲時所重有石秀齋集行於世

明史

參修
通志

蔡懋昭字允德上海人嘉靖十九年舉人署嘉善教諭擢
知新河縣遷守趙州家宰胡松稱其賢擬內召而太守
陳煜齟齬之拂衣歸會御史顏思賢過趙父老攀轅泣
訴前州守治狀及去官之故顏抗章首舉之卽家起桂
陽州旋同知懷慶丁外艱補肇慶海盜許恩者築城陽
江沙島東連惠州與林道乾遙相犄角懋昭用聞示以
恩信恩降一日忽馳入恩幄坐好言令解散諸黨凡六
千餘人遂命將校率恩入謁制府爲請命赦不誅林道
乾失援亦詣軍門降拜思州知府城苦無井民間從三

十里外取水憇昭肅衣冠禱天四門各穿一井水旋涌
民稱爲蔡公井致仕歸思民肖像祀之歷官三十年至
不能舉火年至九十餘卒

陳志
賢達

陸樹聲字與吉華亭人析縣後爲青浦初冒林姓及貴乃
復家世力田樹聲少務農業卽喜讀請於父從師受學
嘉靖二十年會試第一選庶吉士授編修壬子請假歸
遭父喪丁巳起南京司業未幾復請告去起左諭德掌
南京翰林院尋召還春坊不赴乙丑起太常卿掌南京
祭酒事嚴飭學規著條教十二以勵諸生神宗嗣位卽
家拜禮部尙書力辭不得乃赴闕初樹聲屢辭朝命中

外高其風節遇要職必首舉樹聲唯恐其不至張居正當國以得樹聲爲重用後進禮先謁之樹聲相對漠然意若不甚接者居正失望去一詣政府見席稍偏熟視不就坐居正趨爲正席其介介如此歲終陳四方災異請帝循舊章省奏牘慎賞賚防壅蔽納讜言崇儉德攬魁柄別忠邪詔皆嘉納萬歷改元連疏乞休居正語其弟樹德曰朝廷行相平泉矣平泉者樹聲別號也樹聲聞之曰一史官去國二十年豈復希揆席邪且虛拘何益其冬請愈力乃命乘傳歸辭朝陳時政十事中言用內侍以給埽除而倒持旁落之漸不可不防優外戚以

示眷異而非分無厭之求不可不節語多切時弊居正就邸舍與別問誰可代者舉萬士和林曠比出國門士大夫傾城追送皆謝不見樹聲端介恬雅翛然物表通籍六十餘年居官未及一紀與徐階同里高拱則同年生兩人相繼柄國皆辭疾不出爲居正所推卒不附己給廩隸如制加太子少保再遣存問年九十七卒贈太子太保諡文定子彥章字伯達萬歷十七年進士授行人以父老在職二年卽乞養歸仍給半俸異數也後歷官至南京刑部右侍郎工詩文善書法

明史參修峯
御先賢錄

范惟一字允中宋文正公十六世孫世家吳門父北溪始

遷松之泗涇遂爲華亭人家貧投經成嘉靖二十年進士知鈞州擢濟南同知轉工部郎出爲湖廣僉事分部荆西捕治土豪一方懾息潛沔潰漂溺廬舍下令弛徵發粟賑貧者再擢山東參議督兩浙學政陞按察使晉江西布政使遷南太僕卿乞歸弟惟丕嘉靖三十八年進士終光祿少卿惟丕長子允謙隆慶四年舉人允臨自有傳惟一孫必試萬歷四十六年舉人

妻志

張鶚翼字習之上海人嘉靖二十年進士授兵部職方司主事守山海關改吏部稽勳司歷文選郎中擢太常少卿提督四夷館時宰臣用事久諸附麗者率引據要津

鶚翼力請南得通政司右通政賊師尙詔起淮蔡留都
戒嚴分督通濟門議者以城外竹木宜焚徙鶚翼言根
本重地不宜以小寇先自擾示之弱尋遷都察院右僉
都御史巡撫貴州便道過海上時倭寇薄城下因留以
繫人心日夕爲捍寇計寇築長圍數重堞幾毀乃撤民
扉爲柵且戰且修復出粟以廩登陴者踰月寇退乃之
官丙辰以星變免歸歸葺敝廬日邀故人觴詠愍郡民
困兵賦著枯魚歎黃丞行以諷切當事疾亟猶口占授
子弟答郡守論民瘼書引己疾爲喻所著有須野集易
說辯訛孫泰階字爰平萬歷四十七年進士歷官溫處

道以廉正稱

陳志
賢達

車宜陽字子元上海人居沙岡父恬大理寺卿宜陽師事
天台王度同郡徐獻忠受經日讀萬言博觀先秦兩漢
諸子稗官百家旁及國朝掌故郡縣文獻卽之能縷數
以對嘗游國學司成鄒守益黃佐引爲入室弟子詩喜
元白文醇茂古雅著有中園雜記金蘭集藏於家

上海志

何良俊字元朗華亭人居柘林少與弟良傅皆負俊才時
以二陸方之良俊由貢謁選當事者重其名授南京翰
林院孔目南都故多山水良俊具勝情題詠殆徧會趙
文肅貞吉視院篆引與深語定文字交後王諭德維禎

至待良俊尤加禮焉每出游必挾與題襟倡和後乞歸故里益厭俗一切傲然不屑於學無所不窺千言立就著述甚夥並行於時子元之字又元亦以淹雅見稱良傳字叔皮少穎異十歲通經史十四補諸生拔貢嘉靖十九年領鄉薦明年登進士授行人遷刑部主事改南禮部儀制司晉主客郎中南京寺觀多賜田久爲勢家侵奪齊庶人久縱恣會有廢寺材木直數千金欲抑其直強市之又諸司濫用教坊工役良傳以法守所在不能曲承遂不樂居職乞致仕章再上得請歸與金陵顧璘關中馬汝驥及同郡徐獻忠張之象以文藝欣賞結

詩社各論撰成一家言有叔皮集

郭志文苑

唐志大字子迪華亭人嘉靖二十年進士將謁選念母春秋高又獨子求南曹以便養親投南行人司副旋疏乞終養家居躬親稼穡以給甘旨會倭寇起聞吳興地僻率母居焉母卒護喪冒兵刃歸葬里中復趣還吳興遂病不起其沒也無以爲斂妻子無以爲食欲歸故里無以爲家聞者悲之所著有僑居賦及高廟聖政記後李

昭祥葬焉

郭志獨行

朱察卿字邦憲上海人父豹官福州守察卿幼敏慧九歲喪父哀毀如成人事母蔡孝敬倍至邑令黃文煒推官

陳懋觀並重之然察卿未嘗有私謁後兩人沒於官爲經紀歸其喪生平慷慨重然諾韓謙貞之沒獨力葬之他婚嫁讀書習業親友難其事者察卿若有簿籍促其期而賜給隨之少習舉業稍長閱覽典籍不屑爲時文詩筆古雅絕倫所著有邦憲集十五卷太倉王世貞以爲徐孺子郭林宗之流人以爲允

上海志

張世美字濟之華亭人以恩選入太學名譽播京師詩古文卓然成家其述征憫農二賦尤近諷諭謁選得幕職僅十月自免歸與詩人王良佐輩結社倡和爲樂

興志

倪邦彥字伯獻上海人居石筍里父淑邦彥弱冠爲高才

生以貨授光祿寺丞會穆廟覃恩父得封子甫英又領鄉薦喜曰親沾寵命子列賢書差自慰矣何必作達官思之爛熟也旋擢桂林府通判卽致仕居鄉懲俗浮薄侈靡欲以古道力挽之更號一甌子取嵇康養生論中語也嘗仿應璩作百一感詩一卷行於世唐文恪文獻讀之比於簡兮蟋蟀諸篇

南雁志

袁士仲字亞夫華亭人居蕭塘善屬文弱冠補諸生第一以歲貢授興安訓導歷陞南康府教授內行純篤撫弟友愛甚至弟苦徭役爲力謀以免有姪慆泊遠方歷十餘年士仲招之歸給以田舍人以爲難年八十五卒門

人張尙書勗志其墓

奉賢志

沈耀字徵德華亭人少爲諸生好古文詞博綜羣籍購求手鈔靡閒寒暑性簡伉寡諧獨與張世美徐獻忠何良俊良傅善嘗居郡城構小亭四植花竹唐六如題曰雨興與數子討論經史其中以自娛

郭志隱逸

宋賢字及甫華亭人居東新市嘉靖二十三年進士令新昌經度畝澮塞東溪以禦潦濬西溪以備旱歲大稔徵拜御史按四川蜀世子嘗以事餽金賢卻之丁父憂歸哭泣喪明不復出年七十五卒

樓志

楊允繩字翼少華亭人居葉謝嘉靖二十三年進士以行

人擢兵科給事中疏論閣部大臣受餽遺不貲蓋指嚴
嵩言也已巡視光祿有寺丞胡膏爲嚴客允繩劾其虛
冒物料貪鄙不法膏誣允繩譏訕嵩陰中之上震怒廷
杖下錦衣獄比罵父律擬絞在繫五年會星隕如雨占
者以爲咎在臣下不忠遂列名上請行刑以應天變庚
申十月朔死西市黃霧四塞天下冤之初應繩里居有
郡佐刑酷日事敲朴遺書借其夏楚曰家有悍奴請治
之與民分痛佐慚稍戢後三年而嚴氏誅穆宗登極贈
光祿寺少卿諡忠恪子應祈字懋延甫弱冠痛父冤匍
匐橐餽口省父獄中退而蓬跣蓐食悲號顙天願以身

代遂刺臂血書疏將擊登聞鼓鳴冤母黃孺人泣止之
曰楊氏自祖父四傳僅爾一脈藉令復蹈危機徒死無
益焚其草格不得上久之傳聞采取靈芝應祈齋糧入
山至平坡寺得芝二本具疏上之請代父死黃孺人復
止之於是服蒼頭短後衣跣躡長安街頭徬徨無以爲
計遂入獄與父決竟不食死時年二十七允繩竟不免
黃孺人偕子婦袁奉兩喪歸吳國倫誄之曰一時雙櫬
返煙雨暗江東天下聞而悲之孫忠裕舉鄉薦上疏請
旌奉旨建孝子節婦坊表其廬

郭志名臣
又獨行

彭應麟字泰符華亭人居橫岡嘉靖二十三年進士知樂

清縣會中丞檄令勞師應麟心計手籌咄嗟立辦吏士
數百千人竟日夕無譁者擢南刑曹出守邵武內平山
賊外禦島倭規條畢舉以病致政歸應麟未第時友人
蒼頭持蓋立倉卒自外入觸兩齒落友人方駭懼應麟
絕不介意徐曰此吾不慎所致赴試南都館人有少婦
挑之遂移館舍以避子汝讓自有傳曾孫彥臣萬歷四
十六年舉人爲常山知縣

陳志
賢達

王會字子嘉華亭人居七寶嘉靖二十三年進士授屯田
司主事擢虞衡司郎中時仇鸞怙寵故促期辦鎧甲兵
仗會不爲動出知桂林府鸞修前怨誣逮詔獄廷議訟

其冤謫紹興通判遷建寧同知擢知漢陽府以按察副使治兵瓊州州有生熟二黎阻險相附與舶商陰結莫可追獲會下令吏卒有盜失不知狀及知狀不畢捕者與盜同罪不踰時盜息無何請歸子翊恩萬歷十六年

舉人

婁志

袁福徵字履善華亭人嘉靖二十三年進士授刑部主事與李攀龍王世貞宗臣同官有小詞林之號晉郎中世宗以邊事殺兵部尙書丁汝襲欲盡罪諸部曹郎福徵論救王忬不當死謫知沔陽州攝黃州府同知潛師殲賊拓地二百里立黃安縣補鞏昌遷唐府左長史以發

僞疏忤中貴意褫職復羅織冒禁乘傳下獄事白歸以詩文基酒自寄性奇爽倜儻出言若流釋褐六十年家徙四壁殘書萬卷而已子之熊之熊皆負才名孫思明萬歷三十五年登第官南祠部郎有清節

妻志

張承憲字監先華亭人居朱涇祖縉官副使承憲嘉靖二十三年進士爲行人賜一品服使朝鮮王出素紙乞言援筆立成詞翰雙絕贈奇珍悉卻之又兩使親藩俱反其餽遺遷吏科給事中時邊吏請聽關外牛羊易米豆承憲條五不可狀不果易又疏言宜止科斂禁賄賂嚴舉主之罰重部院之臣及久任以責成功撫臣不宜數

易詔皆納焉其陳請援禦倭寇事宜俱見諸施行丁艱服除補原官乞歸卒著有端諒堂集

妻志

韓綸字縉之上海人以貢入太學選景寧主簿景寧險瘠民多盜礦綸捕治之餘撫諭悉服縣故多虎患綸禱於神虎逸去屢攝縣事以廉勤聞時鄰縣有殺人獄三人悉諭死處守梁某檄綸鞠之綸立釋其二曰法祇一抵也處屬十縣多宿逋御史委綸辦理頗嚴綸曰是徒驅窮餓於溝壑也曷若俟秋成帶徵卽具詳會有詔蠲免尋以疾歸民思之

浙江通志

李昭祥字元韜上海人居竹岡嘉靖十六年應督學試第

一賓興日有司以白金代燕昭祥曰非禮也率諸生謝卻之是歲舉於鄉二十六年登進士授浙江蘭谿知縣俗生女不舉昭祥令民閒育三女者復其身三年遂無棄女者陞南京工部主事轉郎中會本生父喪移疾歸已遂致仕昭祥性至孝八歲喪母哀毀如成人嗣父塾爲沙縣簿坐事昭祥走數千里訟其誣得白塾晚舉五子撫之皆有恩友人行人司副唐志大沒而家貧昭祥迎養其母撫其諸子宋堯咨客死留都斂而歸其喪置義田五百畝以助里徭飢疫後令人掩埋骸骨其施惠類如此所著有潁陽雜稿慎餘錄龍江船廠志讀史一

得棲雲館集總若干卷子容春含春以孝友稱容春子繼元萬歷四十三年舉鄉薦授臨湘知縣縣人至今思之陞刑部郎請終養歸含春七子繼抗繼涉最知名繼涉早世學行純粹有萬石風

郭志名臣

朱大韶字象元華亭人由莘莊遷郡城嘉靖二十六年成進士選庶常授檢討冊封襄藩分校禮闈時倭寇起東南大韶以親老乞改南雍遂得司業迎養官署未幾解任歸築精舍構文園以友朋文酒爲事性豪俠軒舉晨起登快閣手丹黃點勘異書數葉始就櫛盥應賓客座右陳彝鼎鼎洗暇則展法書名畫或者述賦詩客至留

連不勝杯酌而喜人飲徹夜無惰容騷人墨卿無不履

次於戶者卒年六十一

郭志文苑

徐陟字子明華亭人階弟嘉靖二十六年進士授兵部武庫主事轉車駕郎中改尙寶丞陞少卿歷光祿太僕太常轉南太僕卿改大理卿陞南工刑二部侍郎臨事剛決立朝二十年五轉皆南不假門第以進引疾乞歸卒萬歷中賜祭葬居恆儉約然篤故舊吳長史稷沒後家貧逋稅捐貲代償倭亂時諸立功死事及婦女殉節者出私帑白有司爲建祠長子球中書舍人仲子琳嗣仲父陳以階廕官至楚雄守所至有循績叔子爰自有傳

婁志

周思兼字叔夜華亭人居藻里嘉靖二十六年登第除平
度州知州躬巡郊野坐監輿中攜飯一盂令鄉民以次
舁行因盡得閭閻疾苦狀悉蠲除之王府奄人縱莊奴
奪民田監司杖奴斃奄迫王奏聞巡撫彭黯令思兼讞
之王置酒欲有所囑竟席不敢言思兼閱獄辭曰此決
杖不如法罪當杖以王故加一等奄誣告罪當戍以王
故末減監司得復秩旁郡飢民掠食所司持之急且爲
亂上官檄思兼治之作大小木牌數千散四郊令執牌
就撫悉賑以錢穀事遂定舉治行第一擢工部員外郎

督臨清輒轍士民遮道泣送河水將決思兼募民築隄
身立赤日中隄成之日秋漲大發民免於災進郎中出
爲湖廣僉事岷府宗室封將軍者五人殺人掠貲財監
司避不入武岡者二十年思兼縛其黨繫獄有五人藏
利刃驀入思兼室揖而捫其臂曰吾爲將軍百口計將
軍乃爲此曹孟邪皆沮退乃列其罪奏聞悉錮之高牆
還田宅子女於民間民大悅遭內艱去官久之起廣西
提學副使未聞命卒祀名宦鄉賢私謚貞靖先生子紹
元字希安隱居力學工八分精篆刻著有貴我編紹節
字希允諸生以病不應科舉論著兵農水利救荒賑貸

諸書皆切要務紹元子裕度自有傳陳繼儒曰萊峯先生文類蘇長公詩類李太白善行草兼工小畫而未嘗以詞翰名參究理學得其淵微而未嘗設皋比以講學名語人曰蟬蛻人欲之私春融天理之妙龜山有悟之言世稱先生無日不學無日不檢其過故居官則宜官處俗則善俗安貧樂道終始一轍學有實用蓋得力在性命故也

婁志

高士字惇甫華亭人嘉靖二十六年進士司理寧波阮甲者以殺人論死士疑其冤默禱於神夢中恍惚以阮乙告訶得其人一訊而服御史行部至責一曹吏移怒令

士前曰以一曹吏故庭辱令非禮御史悟益賢之奏最
得祠部主事有欲推補銓曹羅致門下者士不爲動同
里楊給諫以忤執政下詔獄士起居慰勞比死爲文以
哭之語侵執政無顧忌以父年老乞南改南吏部主事
尋移疾歸闢園池蒔花竹日邀父執爲文酒會以娛之
前後部使者疏薦終不起弟才與兄齊名官豐城訓導
季弟年從弟選俱以孝聞年子承祚萬歷二十三年進
士官翰林院檢討

陳志
賢達

龔情字善甫號方川上海人嘉靖三十二年進士由行人
擢禮科給事中時警報旁午情條飭邊防豫儲蓄均兵

餉蠲額徵四事復封駁移取太倉銀兩詔書辭旨剴切以會勘伊庶人不法事忤旨謫德清丞稍遷南昌司理歷南工部郎中隨罷免情少聘韓氏女病廢或勸改圖不聽女亡始議婚性抗直有古人風著撮殘稿從弟愷字次元號全山嘉靖二十六年進士授慈谿令入爲御史會咸寧侯仇鸞倡馬市首疏論之杖闕下得不死條上邊事六曰嚴紀律別功罪撫遠人實軍伍選將募兵出視兩淮鹽政又按西粵屬吏不職者輒望風解綬去尋列靖江王驕恣狀復疏止大征粵寇上是其議當事者以此忌之遷山東參議屬大惶惶下令捕得惶者易

粟倍於是蝗不爲害遷湖廣副使引疾歸愷剛方喜面折人過爲時所憚及卒知府臧繼芳歎曰我輩不得聞

過矣

上海志

吳潮字子信華亭人居張溪年二十始讀書偕其叔梁攻苦晝夜不輟補諸生弟子執經問難者自遠而至督學聞人詮聘輯南畿通志分撰雲間諸事類嘉靖二十八年舉順天鄉試恬靜寡欲以質直稱子之賢性端穆不苟言笑補博士弟子員有聲黌序父沒躡踊不欲生竭力治喪葬時困踐更或謂仲弟稍饒給力可辦曷劑焉曰兄弟直左右手割左醫右一體謂何卒分任之年八

十卒孫嘉允自有傳

郭志獨行

石應朝字思吾上海人嘉靖二十八年舉人任餘杭令樹
蔬而食家織而衣買水而飲邑人爲之謠曰米載雲間
白泉沽茗水清朝聞之曰石使君名與茗水竝傳生平
之願足矣

浙江通志

楊有爲字選卿青浦人居謝宅嘉靖二十八年舉人杜門
讀書不涉戶外事卒以窮餓死知府李多見聞其賢爲
文祭之且以不知其人自責焉

青浦志

曹世龍字子見青浦人居琴村父鼎以貲授指揮使兄弟
三人世龍少孤嘗以事謁上海知縣鄭洛書洛書器之

語其兄曰好視季季非常兒也兄感其言延師教之嘉
靖二十八年舉於鄉世龍家有腴田在殿山湖旁頗饒
沃故爲縣中富姓其後稍稍衰落世龍旣得舉舉餘業
而振之乃讓己產以報兄及洛書子避倭至松江世龍
復割田歸鄭氏子孫以奉祭卒年四十九子志尹字重
甫太學生多四方賢豪長者交知縣屠隆尤重之晚年
好收金石鼎彝圖書邑中推博雅家第一沒後歸有光
志其墓孫大臨字泰叔大雅字雲門大羽字驥仲皆高
材世稱青谿三曹

青浦志

董傳策字原漢上海人居吳會曾祖綸父體仁竝以學行

著稱傳策九歲能屬文嘉靖二十九年進士時分宜父子怙寵不法諸臣以觸忤抵死者數輩傳策以刑部主事抗疏劾論謂其墮邊防鬻官爵蠹國用樹黨與擾驛遞壞人才六事請斥之以謝天下上怒下詔獄究主使世蕃陰嗾典獄者撈掠楚毒備至再絕復甦會地震得宥謫戍南寧隆慶改元遵遺詔召復故官尋擢爲南京禮工二部侍郎然性剛繩下過急賊獲無賴者懼不免難遂作太師徐文貞爲志其墓深悼惜之孫象恆自有

傳

明史參上海志

杜時登字庸之上海人嘉靖三十一年舉人爲瑞安令吏

有懷金以嘗者立卻之條上興革十事監司著爲令遷

浪穹令投劾歸掩關謝客絕迹公府湛思著述年八十

三卒子獻璋有傳獻璠官漳州府同知以廉能著

南匯志

顧文陞字履階上海人嘉靖三十一年舉人爲湖南醴陵

令廉介有聲以不善事上官改寧國府學教授行李蕭

然士民追送至二百里外瞻望多垂涕者旋致仕歸杜

門卻埽不入郡邑家益貧知縣鄧鏞知其賢時餽遺之

年逾八旬忽辟穀二十餘日盥漱端坐而逝

上海志

宋堯俞字叔然華亭人世居虹橋嘉靖三十一年鄉薦獨

居別業不入城市以節俠著聞嘗游南雍張居正爲祭

酒課置高第及相欲延以館席屬徐文貞具裝遣之謝
不往丁丑偕計以失文引不得試日游燕市無刺可慢
滅也居正聞之命諸子就拜堯俞乃報謁居正出就諸
子舍見之因留之曰君毋歸老夫曩以文知君君今獨
不當以文課吾兒乎請就邸舍明日致廩餼堯俞不得
已因留焉會居正遭父喪堯俞從諸子問奔喪期則以
重違兩宮對堯俞乃上書諫曰國家當土木之後安危
繫于肅愍然猶懇乞終喪景皇莫奪今覆孟安瀾之日
正相公行禮知足之時且令天下後世以爲準式曰昔
有江陵相公者兩宮留之不獲主上挽之不能禮不可

違如是一舉而名教重風俗敦矣初居正欲以紫薇舍
人官之及得書太拂其意堯俞默默不得志以病卒於
京師堯俞所上書纔纔數千言一時傳誦稱爲先秦古
文馮時可爲堯俞作傳具載其書見時可集中所著有
薊門集若干卷

郭志
文苑

屠寬字德宏上海人嘉靖三十二年進士授南駕部主事
陞祠部郎轉浙江僉事調滇南滇撫鄒欲誣黔國大逆
委寬推鞫止罪其奴鄒復誣奏鐵索箐居民嘯聚得旨
勦捕寬釋放平民數萬鄒益恚坐罷歸後有訟其事者
復召用不起家居貧甚卒年八十一

陳志
賢達

唐自化字伯成華亭人家金匯塘嘉靖三十二年進士授
將樂知縣以治行最徵拜御史出按直隸山東山西查
補積逋料直三月事竣惟順天徵解不前自化疏稱畿
內宜從寬恤詔罷其征都人大悅以中忌改行人司正
歷兵部郎中時值邊警部務殷繁自化剖決如流絕無
留滯大司馬楊博倚重之

奉賢志

華秉中字正夫南齊孝子寶十六世孫也自梁溪徙居上
海嘉靖三十二年進士除東昌司理多異政一郡稱爲
神明擢刑科給事中多所建白分宜方柄政威焰烜赫
竟疏劾之不報遂引疾歸後遇寇亂有監軍欲開鎮雲

開公曰敝邑方罹兵燹恐不勝供億之苦聞言遂止松人之不重困其力也卒年四十五

陳志賢達

唐繼祿字子廉上海人弱齡喪父偕其兄力耕績學成嘉靖三十二年進士知遂安縣有惠政郡檄徵輸浮常額奏記罷之豫募兵儲粟若寇至者未幾島夷猝起所至殘破獨遂安以有備獲全有囚殺人獄具稱冤不已繼祿往驗治支體果無傷惟心道斂如石立訊囚曰汝乃飲之鹽漬乎囚叩首服召爲御史歲大旱疏修省十事又奏行里甲法詔頒示諸郡縣皆行之出按湖廣墨吏望風解印綬會興山盜起聚衆三千人縣官利盜礦匿

不以聞郡守徐學謨上狀繼祿卽馳檄縛縣官陰遣沙市趙巡檢詣賊寨諭以朝廷威德令自解散來歸者人給一鈐符俾寧其家月餘賊盡散擢大理丞晉右少卿轉南京操江僉都御史再陞右副都御史奉敕總理山西等處屯鹽未幾疾作移告還家遭母喪哀毀疾增劇猶竭力治葬事三世祖塋之頽圯者悉加修葺喪未終

卒年五十一

上海志

張德瑜字中美華亭人曾祖弼傳見前束髮受書卽通大意孫尙書承恩呼爲小友年十七入邑庠爲文警刻峭拔不名一家嘗謂先秦之文尙骨兩漢之文主氣舍是

言文昌黎所謂陳言耳時人韙其言領嘉靖三十四年鄉薦後再上春官俛得復失遂歸疾卒年二十八士論惜之以詵萬歷十三年舉人以誠萬歷三十一年舉人桂林府通判以訥廩生以孝行旌

張氏家傳

趙廷炯字堯章上海人舉嘉靖三十四年鄉薦授真陽令俗武健喜訟炯力懲之威愛並著邑賦繁瑣仿條編法行之民稱便真陽百年來無滿三考者有之自廷炯始遷錦衣衛經歷保全建言被杖諸臣拜南虞衡主事轉屯田郎晉潯州守時午山猺方橫炯意主招撫先以大軍壓其境而遣辯有口者諭以朝廷威惠咸聽約束岑

氏中絕爭繼廷炯言武靖遠方不宜無守岑氏非有大
功德不應復立卒從其言尋致政歸卒年七十

陳志
賢達

楊道亨字豫甫青浦人居楊扇嘉靖三十五年進士授行
人遷刑部郎擢真定太守時畿輔戒嚴郡三面皆土城
出羨錢甃之而月而畢復築滹沱廢隄以護城濠久之
滹沱水橫隄且潰益置水牛竹槌捍之身立城上爲文
以禱有若青羊者一目獨角昂首而逝水遂減民以爲
神又修城垣學宮以羨粟四百石付工匠事竣遷雲南
副使去而前撫臣故高新鄭客與道亨有隙且謂文貞
鄉人借此劾奏因下御史按問諸將作受直咸有狀吏

氏叩頭請曰楊使君僅飲一杯水奈何以此朽粟饑之
御史上疏曰故真定守楊道亨材而廉廉者不必盜材
者亦不須朽粟事得白復其官而道亨已卒

陳志
賢達

灼字時章上海人嘉靖三十五年進士授行人拜刑科
給事中疏陳三吳水災乞蠲賦言甚詳懇轉戶科時江
南民歲輸廩諸曹人衆地分奸蠹百出灼疏請立祿米
倉以戶曹一人主之歲省民財以萬計遷吏科都給事
中晉右通政卒年僅四十五灼久居諫垣多所建白與
兄廷炯竝以清正聞孫東曦自有傳

郭志
名臣

楊銓字朝明華亭人嘉靖三十五年進士授行人擢南吏

科給事中營卒變起大司馬恐激變甘言婉撫銓計擒首惡上疏極言其不可縱無何河池營卒復毆其偏將因劾罷本兵尙書一時偉之在南垣七年三遇大計先後所劾卿寺藩臬勲貴不下百人擢江西副使晉廣西參政會前所劾怨家構蜚語中傷報罷敝衣糲食僦居

南禪僧舍年七十五卒

陳志賢達

姚體信字汝中華亭人居五保用平湖籍登嘉靖三十五年進士授主事轉廣東司郎中治獄嚴明近幸豪貴無少假時稱執法郎出守南陽值大饑發粟賑民全活無算懲墨吏革羨餘擢豫省左參時柄事者方納苞苴體

信於政府要津不一通謁遂罷歸

金山志

杜時騰字冲之上海人嘉靖三十七年舉人官石埭教諭時文廟忽發異香瑞芝產泮池諸生相率賀已而仲子宗彝從子獻璠長孫士全南北得雋者三人遷黃縣令出冤獄二人尋罷歸黃人攀號送之時騰出詩留別父老曰三年休養力一旦別離情稅事須先足苗田宜早耕身家忍處保衣食儉中盈回首雲山隔飄然兩袖輕年八十餘猶作蠅頭楷書無疾而終子宗翹字振卿恂恂玉立父在任時獨以身任家政嘗帶經行田課耕作曰力田吾家世業也子士全舉進士起家知縣宗翹以

寬勤二字爲勛及爲給事中宗翹見其進天變陳言三
吳水災諸疏輒欣然曰吾子居諫官我嘗戒其務勤事
無喜事務正言毋詭言今庶其不負訓乎受封後猶居
子舍問寢上食必夫婦與偕迨侍老疾衣不解帶親滌
廁牖與諸弟怡怡白首跬步不離周卹三族不使失所
居恆褐衣徒步溫然長者卒年七十四士全後陞太僕
寺少卿轉南太常寺卿刑部右侍郎晉工部尙書歷官
勤飭廉靜寡欲與人無競云時騰宗翹俱累贈工部尙
書宗翹次子士基甲午鄉薦南兵部郎中有儁才能書

郭志
獨行

夏時字人正華亭人幼孤事母至孝年十六卽授徒里中門下士日進束脩所入竭力養母時經月不知肉味也成嘉靖三十五年進士由中書舍人擢戶科給事中疏論陶仲文等幾不免以憂歸遂絕意仕進獨坐小樓布衣蔬食郡縣罕覩其面幾二十年後召命三至自戶垣至吏左皆不赴年六十八終

郭志獨行

張仲謙字士益華亭人莊懿公五世孫嘉靖三十八年進士時徐文貞居政府仲謙姑爲文貞夫人每進謁文貞與諸進士旅進旅退不私謁授職方居武庫七年大司馬楊襄毅爲文貞言武庫郎賢且積資久宜置要地文

貞以語仲謙不應謂兩尊人春秋高願得外補以便省
覲遂參議楚藩文貞既罷屬新鄭修故隙根株其親黨
仲謙入覲偕一鄉人同見新鄭問曰與徐公戚乎仲謙
曰徐公夫人家姑也新鄭改容曰眞古君子徐公在事
久何不聞公名仲謙爲治喜平反楚囚某年十二以奴
傷人抵死謙謂宜坐奴且年十二不當死出之茶陵州
守黃成樂以誣被繫言於當事得無恙後黃治吳松有
功遷江西副使進雲南參政黔國兄弟構隙幾弄兵仲
謙移檄留都分別其事解之聞父喪歸堅臥不出兄弟
友愛出入與俱隱居三十餘年八十六卒

陳志
賢達

張烈字明建華亭人嘉靖三十八年進士時文貞在朝烈
於公爲內姪一日謁朝房留飲指摘時政語侵分宜文
貞爲呼飯罷酒授都水主事出相度南旺諸泉源南旺
所部十二泉夫甲與諸胥相蒙爲奸策馬巡隄水涓涓
可通處卽令主者濬之罷泉官之不職者至馬房一泉
尤爲汶水所賴決意開濬嚴督夫役一日而泉通津口
歲輸無一染指吏民畏懷之在事七月卒烈志氣凌厲
不爲依阿嘗作伯夷武侯徐仲車文文山贊以見志乙
卯計偕憤楊忠愍死西市作正氣歌又嘗爲三守銘因
自名三守子蓋守直守貞守廉也文貞聞其卒歎曰此

古所謂剛者恨未有人陶鑄之耳卒年三十一所著有

殷遺錄及巡泉詩稿子孫自有傳

郭志獨行

秦嘉楫字少說上海人嘉靖三十八年進士初授行人使
周藩周王偉其風度厚贐之悉謝卻乃衣以一狐裘曰
天氣方寒幸使者爲遠道計嘉楫不得已陽諾至杞縣
託同年某以裘歸王曰某賤臣也何敢辱王服其介節
如此改御史遷浙江僉事降光州判官進汝寧推官陞
南京工部主事致仕家居校輯羣書手自鈔錄所著有
鳳樓集

郭志文苑

施用字子中華亭人家貧事親能盡其養與人溫恭善下

力學不售由選貢授瑞州通判以廉慎聞

郭志獨行

許汝升字海喬華亭人居田村嘉靖四十年舉人守陳州令民有罪者入粟實倉儲凶歲備後歲果大稔民賴儲粟全活甚衆改鄭州遷潯州府同知卒子身萬歷甲午舉人孫譽卿萬歷癸丑進士爲名諫議

陳志賢達

王淶號留庵華亭人嘉靖四十年舉鄉薦不問生產不飾車騎選中牟令歲大稔民剝樹爲脯死亡徧野淶徒步阡陌閒招流民瘞枯骨澤餓莩全活甚衆邑界藩府王孫比屋而居淶以德感孚之里豪有倚藩貴煽虐閭左者按之如法與河使者議忤量移致政歸僅存襦被一

囊居家舉鄉飲大賓著經史纂要古今名臣奏議若干

卷

陳志
賢達

艾可久字德徵上海人嘉靖四十一年進士授太常博士擢南御史巡視上江劾勦貴驕縱及大臣附新鄭者四人陞知衡州風度凝遠望之若神喜愠不形於色人莫窺其際吏治清嚴如設權衡自長吏而下無不兢兢奉法庭無廢事民有蓋藏擢山東副使累遷山西布政擢南京太常卿轉通政使請告尋卒予祭葬

湖南
通志

顧學仁字元甫華亭人嘉靖四十三年由舉人任遂安縣慈惠及民政多簡易流寇之亂軍務倥傯而靜鎮不擾

去後民設像祀之

浙江通志名宦

陸中行字伯與華亭人居橫雲山弱冠補諸生究心古籍旁及內外陰陽九流百家諸子嘗游四方談兵說劍數奇不遇卜筮者三尹家之以意創一舫外列爻象八卦形而內則坐榻臥牀茶鐏書架畢具吹簫鼓琴狂歌長嘯時汎權峯洲閒馮思贈以腴田二頃不受客愛其琴酬以百金不市徐階兩招之伯與曰彼不上賓我而幕客我也竟以羈旅終馮時可時爲駕部捐俸載其櫬以還

雲間人物志

宋堯明字憲卿堯俞弟嘉靖四十三年舉人任德化教諭

陞知歸化縣丁外艱歸起補公安改調遠安坐擅用庫
錢被劾謫戍鐵嶺居久之獲交大將軍李如松因從出
塞斬十七級以歸格於例不得復官僅釋伍歸堯明幼
稟異質七歲時嬉游庭前有客詠隔簾看鏡詩忽應聲
曰秦嶺望來雲冉冉楚臺看去雨濛濛時父執袁胥臺
文衡山諸公皆嗟賞不置目爲聖童所著詩文數十萬
言才情橫溢爲藝林所推請成後散逸殆盡

素賢志

潘允哲字伯明上海人恭定公子也嘉靖四十四年進士
授新蔡令時淮汝水溢漂沒民居請覈賑之流移盡復
調義烏徵拜御史按上江出守黃州擢山東憲副內艱

服闋督學陝西嚴示程範士翕然從之會得恭定手書語失詮次心動卽解綬歸中途計聞號跣五千里三年笑不見齒允哲不事家人產敝衣蔬食戊子歲寢寃突幾無煙舉恭定所遺外不益一畝一椽未嘗與齊民爭尺寸卒之日知與不知皆流涕弟允端字仲履先允哲成嘉靖四十一年進士授刑部主事以父恭定長法曹改調南工部權龍江關稅以寬大卹諸商稅入反倍轉駕部以憲副分巡青登巨盜憑險阻出沒廉知左右通賊狀貸其罪而遣之令誘賊縛其魁餘黨悉解島人以歲時入市武弁等襲殺爲功諸島鼓譟稱亂乃暴武弁

罪而檄諭諸島咸叩戟門感泣去晉參政總理漕儲清
政爲之一變先是有司交兌後時領運者又多怠事比
至河水暴漲數敗舟北地早寒河冰易合舟不能回於
是以期會督有司部勒諸官軍以二月至淮五月入牖
八月竝達天津又於瓜州建牖以避江濤令白糧民船
尾漕艘而行永免民運瓜儀之累而苦心擘畫尤在海
運運自淮入海歷膠萊以至直沽險道旣遠怒濤不時
談者色變允端躬歷沿海要害激勵將士以次懸賞罰
格而行之凡爲艘三百有奇運糧十有二萬石不一月
至天津白會通置河以來所未有也後允端遷四川右

轄遂格不行時蜀九絲用兵不數月費金三百萬愕然
曰曩東南中倭禍越數年費不及二百萬金乃今都蠻
小醜費至此乎督府方以平亂功超擢貴用事聞其語
心銜之遂厄之使投紱歸歸構樂壽堂鑿泉鼎石奉恭
定居其中天倫樂事海上以爲世濟其美云

陳志
賢達

陸樹德字與成樹聲弟嘉靖四十四年進士除嚴州推官
陞刑部主事隆慶四年改禮科給事中穆宗御朝講不
發一語樹德言易上下交爲泰今睽隔若此何以勵君
德訓萬幾屢遷都給事中六年詔輟東宮講讀樹德言
自四月迄八月爲時甚遙請非盛暑仍出御講筵穆宗

頗倦勤樹德言日月交蝕旱魃爲災當及時修省及帝
不豫內臣請祈福戒壇樹德言戒壇度僧男女優雜導
淫傷化陛下誠欲保聖躬則大禹之惡旨酒成湯之不
適聲色皆可法何必奉佛未幾穆宗崩神宗嗣位東廠
中官馮保擠司禮孟冲而代之樹德言先帝甫崩忽傳
馮保掌司禮監果先帝意何不傳示數日之前顧乃在
彌留後果陛下意則哀痛方深萬幾未御何暇念中官
疏入保大恨樹德居言職三年疏數十上率侃直會樹
聲掌禮部乃遷尙寶卿歷太常少卿南京太僕卿以右
僉都御史巡撫山東約束僚吏屏絕聲伎山東民壯改

爲民兵戍薊門隆慶末歲輸銀二萬四千罷其兵尋命
增輸三萬樹德請如河南例罷之帝不從第免增輸者
德府白雲湖故民田爲王所奪後已還民結中官謀復
之樹德爭不得乞休歸久之卒子彥禎萬歷二十三年
進士南京吏部考功主事有才識孫景明萬歷三十一
年舉人曾孫慶紹崇禎十五年舉人

明史參修
陸氏族譜

張明正字公甫華亭人居佛寺橋嘉靖四十四年進士授
南京禮部主事轉文選清慎勤敏銓法稱平出秉滇憲
轉粵東大參粵故盜藪多浪於菟二蜚世盜珠爲業明
正率兵討捕之遷蜀憲使轉本省右轄蜀聚粟半供軍

需率爲司廩所耗督府議輸金錢代粟獨爭不可日卒
有軍興得毋虞轉餉乎俄而松潘馬湖告變兵食賴以
足又議罷鑄錢幣蜀人德之轉貴州左轄丁母憂服除
補福建入覲途次得太常卿報遽歸卒年七十弟明化
隆慶二年進士性狷介詩酒爲樂不事生產兄弟友愛

無閒言孫賓選瀛選相繼登賢書

陳志
賢達

喬懋敬字允德上海人父訓寧德丞有惠政祀名宦懋敬
登嘉靖四十四年進士授刑部主事佐漕淮安漕政肅
清遷員外郎擢福建按察司僉事時新被倭難戶彫劫
諸豪右不奉法難治懋敬拊循振刷寬猛相濟瘡痍漸

復橫暴斂迹剽盜攻剽閩廣間勢張甚乃陳破賊狀制
府悉以兵屬之乘閒擊賊賊敗入海轉戰至韶州出奇
計結呂宋直擣其巢賊渠授首事平遷江西參政方行
履畝法條上均賦便民十餘事會大疫藩臬多病懋敬
兼攝七道簿領山積從容應之聲譽益著累遷廣西右
布政會御史某以微嫌中傷乃罷歸懋敬天性孝友宦
轍所至必奉母以行居官廉儉年六十三卒著有廉鑑

四卷子一琦自有傳

上海志

徐汝翼字君羽上海人嘉靖四十四年進士授刑部主事
八遷至廣西布政使會猺獞倡亂汝翼奉敕會諸監帥

壽餉調兵相機勦撫粵西底定遂疏乞歸初汝翼在郎署座主高拱以輔臣攝吏部汝翼終歲無私謁時人稱其高節爲大梁副使蠲煩滌苛禁奸戢暴造士愛民首著嘉績

河南通志
參上海志

陳懿德字伯求華亭人嘉靖四十四年進士官編修與修世宗實錄起居注所載事多秉筆者率經月不能畢旬日事徐文貞與西蜀陳文穆爲總裁下教曰有能一月完一月事者待以不次之擢懿德才識敏捷每月終輒上副本編摩精當陳覽之曰若館中盡如君豈不逸而有成性剛峻爲權貴所嫉謫判汝州稍遷延平司理所

釋三重辟如比部陳邦彥上舍楊廷玉枉盜劉富仔其
最著也召爲刑部主事高拱素知之余尙寶丞時海內
述職者例以撫按舉刺爲殿最華亭知縣鄭岳有惠政
以不善事上官不列薦拱以執政掌銓懿德具以治狀
對拱曰如君言何以撫按無薦剡懿德曰此令無所取
於民則無所奉於上安得薦剡宜處超格不惟勵守令
兼可警監司拱然之召入省垣及拱去國懿德謝政歸
未幾卒

青浦志

王圻字元翰上海人居諸翟嘉靖四十四年進士授清江
令調萬安拜御史穆宗時糾邊帥黨私止廠衛密訪疏

論中官孟冲鞏組等不法罪狀又其時言官被斥冢宰
謝政圻皆力爭之卒忤時相出僉閩中中忌者以他事
謫補曹縣擢守開州均徭平賦行條鞭法便民特遷楚
臬備兵武昌改督學典福建山東兩試所獎拔先後皆
爲名臣遷陝西少參初圻以奏議爲內江所推江陵與
內江交惡諷圻攻之不應新鄭爲圻座師時方修隙文
貞又以爲私其鄉人不助己不能無恙遂撫拾之里居
著書至年踰耄耄猶篝燈帳中老而靡倦年八十五所
撰諸書載藝文皆經世巨儒之學孫昌會領乙卯鄉薦

郭志
文苑

李自華初名守鼇字元實華亭人寄籍嘉善嘉靖四十四年進士第二人及第授編修晉司業歷官諭德所著陸宣公奏議序具有經濟之才工書有金經石刻

嘉興府志

盛當時字明輔華亭人居望河涇嘉靖四十四年進士授大理評事擢駕部改銓曹出爲湖廣僉事性剛直媒孽者衆年三十六罷歸著有燕超堂集

雲間志略

李府字一樂上海人居南匯有忠孝節嘗爲哨官練族丁以助行伍嘉靖中倭偏所城率次子香出戰斬賊首四級乘勝追之賊兵蝟毛而起府父子力戰死明年倭又至府猶子忝年十九慨然曰汪疇何人也吾今報父兄

讎矣迎戰多所斬獲一日立城堞大呼三兒在此敢戰
否三兒者黍小字也賊執火器向黍齊發中彈死後府
孫尙哀上其事於巡撫立忠勇祠祀府而香與黍附焉
香字友蘭黍字思溟

金山衛志

閔電字起光上海人廩生素有膽略時倭寇猖獗募客兵
輒挫衄電與同縣潘元孝倡義團練鄉兵得千人自將
之屢與賊遇多斬獲後賊大至電率眾保新場力竭遂

戰死

上海志

張涓字子清金山衛人嘗練土兵禦倭屢敗之會城中賽
神軍民不設備倭突至緣梯乘堞涓急登城冒矢石奮

力擊刺賊墮城下餘僂而走城賴以完而涓已中彈死

金山
衛志

楊鈿上海人閭左健兒也嘉靖丙辰五月朔倭寇圍城鈿
充守城夫十七日四鼓賊窺守者倦舉梯登城邏者覺
之大呼鈿驚起躍立睥睨開賊以鎗戳之鈿墜壓賊亦
墜城上矢石如雨下賊退渡濠溺死者六十七人遂解
圍去全城之功實係鈿一人云

上海志

顧邦正字鄰海上海人嘉靖閒父被仇陷戍滇邦正在繼
祿旣長問父所在母泣告之遂辭母行歲餘至滇夜夢
父所在晨訪之有見其背上所書鄉貫及父姓氏大驚

曰吾翁卽若翁邪蓋父滇娶所生子也見父痛哭欲偕歸父以無赦令不可乃歸報母後復至滇父已死欲負骸骨歸弟曰兄有父弟可無邪因白之官判曰雲南子盡子道於生前江南子盡子道於身後乃負骸歸南匯志盛坤上海人母顧病心痛藥不能療坤禱天封左臂肉調羹以進母痛立止後復病坤復封右臂痛愈如前母卒

廬墓三年

上海志

韓宏謨青浦人諸生嘉靖甲寅四月倭犯沈巷獲其母欲刃之宏謨號泣請代皆被殺宏謨子亦哭奔救并遇害至今人稱韓似松一門爭死似松宏謨號也

郭志獨行

東時熙上海人性孝友父遇倭將刃之時熙哀請身代獲

釋後父病刳右股調羹以進父遂愈

上海志

徐億字子裁華亭人家泖西倭躡境上億駕輕舟奉父母
避匿遇倭奮力挺擊親遂得免已墮水有浮草隱之越
數日乃脫舟疾億額天請代父病疽親爲吮之及相繼
沒哀毀骨立既葬結草廬墓冬不絮夏不帷削竹爲坐
刊木爲枕亂髮椎結墓去家不四里每歸祀先未嘗還
內晚休廬中墓旁有丙舍不入也喪畢不食鹽酪不拈
髮者十年平湖陸光祖仙居吳時來遇億天竺寺知爲
徐孝子置上座爲醺佛兩日始命櫛而冠之少未受書

獨喜誦船子機緣集似解大旨垂老嬉游城市如嬰兒
當夏手持葵扇葛巾芒屨足脛赤露市人堵立如看世
外人有強億至家令子孫識之曰此徐孝子億張目直
視笑領而已御史溫公如璋疏請建坊表之年七十一
無疾而逝子有亨亦以孝稱

鄒志獨行

李得祥字元益上海人與從兄昭祥有雙鳳之目性孝友
母金以暴疾亡不及嘗藥終身抱恨年將六十丁父艱
哭泣如嬰兒事諸兄克恭召則必唯族兄繩曾被誣逮
獄奮袂直其事弟徵祥爲倭寇所掠泣不欲生得免乃
己子伯春自有傳

上海志

謝字一默華亭人性狷介不喜詣貴人聞客語人過則起立曰恐傳者妄不諧於俗里中多稱為謝古執馮廷

尉恩嘗延為館師

館師志
篤行

周淵字文德華亭人世居青村倭掠海上所過殘破淵甫
齠奉母守故廬城潰母踰垣走卒遇寇寇露刃向母淵
延頸請代寇義之釋母攜周去他寇欲刺殺之卒憐其
孝得不死羅鋒鏑者三年會胡宗憲提兵剿倭淵得脫
歸宗憲幕下有方幅者知其孝欲以女妻之淵以父命
委禽陶氏背之不祥固辭及歸母尙無恙而陶氏母子
以先遇寇不屈投江中死里中至今稱孝子周家

郭志
獨行

徐一愚上海人嘉靖閒倭鈔略海上掘墳諸鎮罹害尤酷一愚被兩刃負母逃避瀕死得脫遂遷郡南松隱里子

咸愚亦以孝聞

上海志

陳仲山字仁卿其先自虎林徙青浦之貞溪幼爲張氏鞠養蒙其姓少工舉業督學楊宜賞識之兄貧悉讓腴產己獨奉父母盡色養父卒甫就斂島寇犯貞溪號哭掖母奉觀而逃已葬父柳涇賊又至乃復奉母還貞溪後居華亭里里人困踐更仲山奮身出代知府胡峻德廉其賢竟罷役婦翁朱克裕客死爲養其養室其孤友人以積逋就逮爲捐資代輸四方負笈者日益多則察其

貧者返贄授餐士用感勵吳太僕炯其一也臺使守令
先後表其門卒年八十九所著有讀易讀論語諸記省
愆日錄子善能孝養有續省愆錄陸彥章重其惇行焉

郭志
獨行

孟羽治青浦人性至孝嘉靖三十三年母炸氏年已七十
一爲倭所擄乞身代不從捐金贖之得還炸驚悸成疾

醫禱弗效治割股以療

郭志
獨行

張同文字從道上海人母孫氏病療百方不愈同文禱天
割左股肉一盞和羹以進母食之病旋愈其割處無血
亦不作楚人以爲孝感所致時同邑王節亦以割股療

父疾聞

郭志獨行

高承順字孝卿華亭人少有至性母施氏暴卒哀慟經月不能起親黨憐之餽七箸受以進父未嘗入口父旅邸遭危疾承順省視所過神祠輒百拜祈禱一日父夢大士授刀圭覺後有異香出襟袖間疾遂愈倭寇海上倉皇奉父奔郡城遇寇寇露刃向父乃以身擁蔽叩頭流血寇義之曰爲孝子丐若死猶掠以行驅渡河水勢湍急極力負父幾墮水寇引手援之登岸遂釋以去父沒盡以財產讓兄弟妻貧寡養之終身子振聲亦有至行人稱爲世孝云

郭志獨行

杜時達字兼之上海人嘉靖末由吏員官紹興府知事遷
遂昌簿廉謹節愛一介不取初邑多積逋以漸追徵民
樂輸納攝篆期月聲稱翕然俸餘悉以新衙舍築垣宇
及去任囊無一錢士民泣涕留送著有紀游草

風餘韻

括蒼葉紀參松

倪甫英字華月上海人隆慶元年舉人令分水有聲調象
山邑竝海土瘠民頑甫英以節儉爲治平易近民賦役
不事追呼民樂輸輒辦先是奸胥叢弊莫可究詰甫英
曰病在版籍廢也乃校定經賦全書上下皆便

浙江通志名宦

唐志范字子期華亭人居顧望塘以選貢宰通許歲饑不

待申請發粟以賑某甲以人命陷乙獄已成廉得其實

置甲於法民快之告歸貧甚卒

南匯志

高舉字伯鵬上海人以貢授應天府訓導應天文廟向無祭舉言宜如外郡例一體致祭擢太湖教諭旋署望江縣篆均水利罷冗徵禁黠吏慎讞獄半載邑大治擢天

津府教授歸卒年七十七子宏謨有傳

南匯志

張誼字履道華亭人贅永豐里杜氏遂家焉好譚易善望氣占候之法倭亂時憩石湖袁氏山莊出望雲氣拉主人疾走亡何賊突入覘知空廬乃去時有沈子猷者留啖檳榔力辭曰蓄逆不敢泊也解維不十里子猷被創

其奇中如此蜀閫張守道提兵備倭來海上以橐鉞爲
爲海錯求寄并五歲兒屬焉守道戰沒誼募善泅者出
其尸躬拭創吮血以斂出所寄歸其子祖觀而還尋以
貢入京抱病歸晚營壽藏見有荒薶翳墓石讀其銘乃
永樂時徵士陸子安墓豫章胡學士儼手題遂捐壙修
葺之所著有高松山館等集子從律嘉靖四十一年進
士官刑部主事

葉蕙號鱸江華亭人娶於徐卽文貞女兄文貞當國有受
橫侮欲白冤者卽代爲申雪或餽以金必拒之有孫曰
日新孝友仗義爲兄償逋贍弟攻讀及卒爲殯葬復撫

其遺孤郡博士欲褒以德行胥役有所需日新日豈有
賄買德行者乎竟辭之所著有衡門寤言畏天錄

陸文貴華亭人少力田致饒富年七十無子嘉靖時倭擾
東南賦役繁重松郡尤甚文貴盡出其田輸縣官以紓
里中之難而自占餘田八畝屬其鄰經紀其喪葬旣沒
土人爲葬於大茅塘之九曲溪有沈銘者爲之志短垣
隱然中有石亭列祀陸氏之先與文貴夫婦及女柳枝
自嘉靖至今垂三百餘年土人護視祭掃猶勿替共稱
爲陸義士墓云

學福齋集

顧汝經字宏初上海人邑中有大徭役率先赴義嘉靖閒

倭寇甫平歲屢告祿汝經助賑兩次時築寶山城爲捍蔽兵荒之後公私力不支汝經與弟汝綸各助築一十五丈蒲匯塘議建廬汝綸獨力成之

上海志

張方字子敬上海人世居浦東少孤嘉靖閒遭倭警復遭家難不得已依母家母食貧守節撫之成立後徙三林塘不妄交游澹於仕進多陰德子耀邦字可交好游俠重然諾不事生產嘗北泝遼海南極閩粵婦翁之兄儲參議昱勸之仕弗樂也孫尙文

國朝雍正十年以曾孫洪置義田贍族事

褒及三世方耀邦竝贈吏部左侍郎

上海志

姚昭字如晦上海人世業儒而貧讀父遺書輒嗚咽流涕
事母孝開門受徒師道嚴重平生自束脩外一介不苟
有撫院行縣詢諸生以民窮財盡宜何如處昭進曰民
窮財盡誠如明公言聞明公進羨餘二千金以助大工
安所得羨餘也撫院愕然徐曰慙哉此生卒以此偃蹇
場屋賦老將詩以見志聞者壯而悲之躬課五子同時
爲諸生人稱姚氏家學及卒門人私謚爲孝廉先生所
著有留耕堂稿藏於家

上海志

喬洪字伯舒上海人績學能文令孫渭下車校士讀洪卷
嗟賞不容口時召洪促席談文或請洪關說面發赤謝

去渭聞而歎曰喬生豈徒以文學哉益禮重之養二親
力具甘旨妹早寡收恤於家成其節授徒至二百餘人
貧者卻其脩脯

上海志

顧綵字南雲上海人居南匯嘉靖閒大旱捐貲濬七竈港
溉田萬頃官旌其門萬歷閒歲饑人相食設廠四門作
粥食之兩次海溢駕筏拯救聚遺骼壅焉孫其言另有

傳

南匯志

陸銓號東皋上海人文旺裔孫父娶後妻授銓老屋數閒
銓精心計致鉅富嘉靖閒倭寇入內地捐金十萬助餉
賜懷遠將軍銜建坊以旌

南匯志

張泮號致齋上海人貢生廷試第一性至孝事父母能得其歡心慷慨尚義急人之難撫弟子如己子凡族屬之不能舉火及外氏之貧者皆賴賙給有喪則斂葬之如禮徐文貞嘉其行招之將薦授中書固辭不就嘉靖癸丑倭氛熾海上當事議築城捍衛泮散財給役身親畚鍤手口盡瘁遂病不起崇禎中邑人德泮以死勤事上學使倪元瑛檄祀鄉賢子令德隆慶元年舉人孫元玘自有傳

上海志

陳一鳴字起靜上海人本朱姓爲人剛介有以張某口語嫁一鳴於邑令所禍且不測或勸其援張自解一鳴不

應曰直須自任耳無禍人少嘗從父宦游以詩受知於
分宜唱和甚歡後應貢入京御醫顧定芳與一鳴善竊
分宜閒言一鳴分宜曰非曩時相倡和者邪我嘗寫其
詩今亡矣君出當令若來見定芳告一鳴一鳴曰某老
矣誰復能望塵雅拜冀旦暮得好官乎竟不往會有鄉
人居銓曹故欲借一鳴示公者一鳴遂不謁選而歸養
母終其身他如憐友人衰老讓次貢引憲綱訶縣尉皆
爲人所難云

上海志

王俞字子昌華亭人居七寶以貢游太學性寬裕見人無
少長貴賤推誠任素以待之嘉靖辛酉萬歷戊子歲大

水旱蠲廩煮糜全活無算生平凡繕城甃路之事銳力
以爲孜孜如恐弗及初俞贅于山夏氏其婦之戚沈後
山過富林見徒涉者溺死欲建石梁未果俞後捐金造
成顏曰景山成沈志也晚築五老峯草堂與兄會日夕
飲酒賦詩爲樂孫庭梅萬歷四十一年進士由刑部郎
出爲廣信府調饒州府有治行累遷布政司參議陞順
天府府尹庭柏四十七年進士授工部主事典試西粵
襟度簡曠有晉人風左遷歸卒俞累贈至府尹郭志
獨行
方鏞字良遠上海人早喪父兄事母及嫂盡愛敬建義塾
捐田以給脩脯訓一方子弟皆循規矩嘉靖中郡守何

繼之運使洪富各撰碑文記其事子岑字秀之克承父

志臺司共旌之

南匯志

余采字元亮方正學先生裔自其先世冒余姓居上海性
卞急有志操人有失輒面數之已亦不妄取人一錢嘗
與婺州人同舟其人道卒采出貲含斂歸其喪晚爲學
博屢著直節所造就多知名

上海志

吳丕顯字希文華亭人居璜溪少孤母田紡織課之比長
能文爲童子師自給姪炯亦就學焉隆慶元年登鄉薦
除承天府通判署荊門州荆俗刁悍繁劇以賦不均紛
紛告訐丕顯親履阡陌上下其賦而均平之衆稱便時

建壽宮以解木有功膺榮錫并贈典左遷襄府審理歸
好施予宗族故舊皆沾其恩子煒字弼明博學多藏書
通陰陽象緯家言調卹親黨亦以好義稱

郭志獨行

喬萬里字鵬翼華亭人登隆慶元年鄉薦知奉化縣廉以
持己勤以卹民尤重學校明倫堂圯力新之逋稅者令
漸次輸納民有訟必先勸諭往往釋忿去擢河南通判
終杭州府同知

浙江通志

莊允中字執卿華亭人少穎悟八歲善屬文里中稱神童
游北雍領隆慶元年鄉薦第一人郡士鮮以易通籍者
允中得歸有光傳治之膺上選於是占經者多易世居

朱涇萬安橋故架木也捐貲首倡改爲石梁一方賴之
年四十無子以百金置妾將婚之夕聞女父爲司倉逋
官課被繫因鬻女償允中心惻立遣人還之不責其直
且周卹焉尋舉子元禎人以爲厚德之報元禎崇禎元
年進士歷官陝西參政

郭志
獨行

顧鏐字廷貴華亭人世居漕涇性慷慨嘉靖閒盡捐田百
餘頃歸公戶輸差舉族賴以息肩者四十餘年其宗人
多好義勲字景賢善治生嘉靖閒避倭入城時以大戶
供軍需勲日輸百金者累月俸字大恩性鯁直人有過
輒面諍之嘉靖庚子丙午連苦蝗旱出粟賑饑全活無

算海舟漁船爲風水覆溺死者瘞之生者給衣糧歸里
良佐字逢宇好施多才嘉靖丁巳郡推董築柘林堡城
捐貲出力公私賴之承遠字伯毅以掾吏授局官捐貲
藥材時當大疫活人億萬計又奉委濬金匯塘田禾沾
溉居民利之承進字伯治性坦率有局量嘗奉委督修
海塘三十餘里一月而畢共事者咸服其才承遴字伯
昇郡邑舉方正有唐昌者侵蝕三千餘金繫獄其妻以
昌妾獻遴長子求援遴聞卽訶止之傾囊代完昌得免
遠近貧乏者恃其緩急終身無倦施

喬鏗字子聲上海人居川沙太學生氣度軒舉好義樂施

嘗捐田二頃助義役建義學設義冢巡按舒汀旌其賢
嘉靖中島夷入寇撫院蔡克廉議築海上護塘九十里
徵鏜董其役捐貲首倡兩月訖工巡按周如斗委募土
兵二千人訓練征剿鏜身在行間手殺三賊所部兵斬
級共一百五十有三生擒者八人監司錄其功交章具
奏謂鏜尙義積勞應論敘行軍門獎賞先給冠帶送部
銓授以丁內艱未赴軍門楊宜委塞川沙窪口以防賊
船收泊又委督工城川沙堡會有蜚語忿恚卒而城卒
完至今稱其保障之功云同時有盛濟時者募兵守護
新場鎮曉果善戰號盛家兵後官青州府通判又潘元

亦募兵設守倭至輒擊走之

上海志

葉蕃春上海人居石筍里嘗宿邑邸主人有僕逃因出追
獨少婦在室日且暮冒疾風甚浪渡浦避之人有妾與
嫡忤肱篋走母家失道夜匿藩春園覘得之密召其夫
與偕歸曰毋揚之恐人以垢汝其質行不愧如此

上海志

松江府志卷五十三終